

扬

州

丛

刻

扬

州

丛

刻

揚州名勝錄卷三 儀徵 李斗艾塘 撰

揚州 陳恆和書林刻

影園在湖中長嶼上古渡禪林之北旁爲鄭氏忠義兩先生祠祠祀鄭超宗贊可二公園爲超宗所建園之以影名者董其昌以園之柳影水影山影而名之也百餘年來遺址猶存江都縣志云在城南揚州府志云在城東按今園址自當以縣志爲是而影園門額久已亡失今買賣街蕭叟門上所嵌之石卽此園物也

南紅橋本南湖狹處編木渡水後湖觜漸出輒植木

成杠謂之南橋紅其欄謂之南紅橋春草夏蒲秋芡
冬葦遠浦明滅小橋出入一段水局最盛過橋西岸
入秋雨庵路

美人橋在掃垢山尾硯池南岸自中埂以下地脈隆
起直趨塔灣靜慧園卽在中埂分支壇巷以上土阜
隆起直趨掃垢山秋雨庵卽在掃垢山尾其中湖田
十數頃水大爲湖水小爲田謂之美人峒峒口建石
橋謂之美人橋夢香詞云聽鶯宜近美人橋卽此西
爲社稷壇居民築屋其上謂之壇巷其下乃掃垢山
接西門二鈞橋西岸之都天廟巷此皆由南門大街

財神廟巷而來者也

靜慧寺本席園舊址順治間僧道忞木陳居之御

書大護法不見僧過善知識能調物情一聯七言詩

一幅康熙間賜名靜慧園及眞成佛國香雲界不

數淮南桂樹叢一聯七言詩一首寺周里許前有方

塘後有竹畦樹木蒙翳殿宇嵯峨木陳塔在其中爲

南郊名刹木陳後寺將頽廢歙縣人吳家龍重修至

今兩淮煙盒貢及高旻寺煙盒皆在此設局製造

秋雨庵本里人楊氏出家之地臨潼張仙洲感於夢

構爲庵名曰掃垢精舍康熙五年靈隱大殿落成後

八月十三日早落月中桂子浙僧戴公過揚州遺四五粒於庵中種之因又改名金粟庵庵四圍皆竹竹外編籬籬內方塘塘北山門門內大殿三楹院中綠萼梅一株白藤花一株緣木而生兩廡各五楹環繞殿之左右後樓五楹爲方丈庵左爲桂園園中桂樹是月中種子花開皆紅黃色右爲竹圃又名筍園園中有六方亭名曰竹亭

掃垢山本名騷狗山夢香詞云走馬試來騷狗地卽此山無樹石古豕纍纍兩山之介容一人行出山口乃西門都天廟廟中每夜經聲不絕廟外多石柱燒

路燈甲寅歲殿前忽生一泉能治病求水者日數百人月餘而竭

通泗門卽西門釣橋二頭釣橋跨子城內市河二釣橋跨子城外市河橋下卽花山澗與南湖通處畫舫馬頭在二釣橋下過橋陸路分二支一抵廿四橋一抵雙橋

轉角橋在城西北角俗名仙鶴膝木橋三孔有橋渡二夫司啟閉日中橋不度板以通畫舫用舟渡人渡春橋在花山澗中三孔皆方上用黃石嵌冰裂文最稱詭制上通二釣橋下通澗中橋東接紅橋修禊

西在掃垢山下橋旁立如來柱

小東門在舊城東嘉靖惟揚志云小東門樓曰譙樓是也又云更鼓銅壺滴漏在此樓上按今之舊城卽宋大城之西南隅元至正十七年丁酉僉院張德林始改築之約十里周圍一千七百七十五丈五尺高倍之門五曰海甯今曰大東曰通泗今曰西門曰安江今曰南門曰鎮淮今曰北門曰小東卽是門今仍舊名南北水關二引市河水以通於濠今之新城卽宋大城之東南隅明嘉靖三十四年乙卯知府吳桂芳始議興築後守石茂華踵成之自舊城東南角起

折而南循運河而東折而北復折而西極於舊城之
東北角止東與南北三面約八里有奇計一千五百
四十二丈門七曰挹江今曰鈔關曰便門今曰徐甯
曰拱宸今曰天甯曰廣儲曰便門今曰便益曰通濟
今曰缺口曰利津今曰東關沿舊城城濠南北水關
二東與南二面卽以運河爲城濠北面作濠與舊城
連注於運河此舊城新城之大略也乾隆三十年旌
德劉茂吉繪揚州兩城圖大街小巷舉目瞭然巡鹽
御史高恆爲記

城河卽市河南出龍頭關有壩蓄水與官河隔謂之

鉞橋北出大東門水關至高橋亦有壩蓄水與官河
隔渭之黃金壩此古市河也今龍頭關淤墊乃於小
東門釣橋下築壩令河北徙出大東門水關匯鎮淮
門市河入保障湖以利東城畫舫凡小東門外城腳
頭敵臺二敵臺頭巷二巷皆畫舫馬頭

龍頭關河道半爲兩岸區蹙淤池所集渾濁污穢五
色備具居人恆苦之

小東門釣橋外由多子街及左衛街抵缺口門多子
街口南由埂子上抵鈔關口北由南北柳巷抵天甯
門其西則爲小東門街口由天甯門城內東入綵衣

街左折運司街教場轅門橋多子街埂子上出鈔關門右折花覺行入九峰園此小東門外新城御道也南巡時塲石清道如鋪沙藉路之例

多子街卽段子街兩畔皆段鋪揚郡著衣尙爲新樣十數年前段用八團後變爲大洋蓮拱壁蘭顏色在前尙三藍硃墨庫灰泥金黃近用膏梁紅櫻桃紅謂之福色以福大將軍征臺匪時過揚著此色也每貨至先歸紬莊段行然後發鋪謂之抄號每年以四月二十日爲例謂之鎮江會

埂子上一爲鈔關街北抵天甯門南抵關口地脈隆

起南接埽垢山北接平岡秋望其上兩畔多名肆如
伍少西氈鋪匾額伍少西家四字爲江甯楊紀軍名
法者所書戴春林香鋪戴春林家四字傳爲董香光
所書云

翠花街一名新盛街在南柳巷口大儒坊東巷內肆
市韶秀貨分隧別皆珠翠首飾鋪也硝消皮襖者謂
之毛毛匠亦聚居是街

亢園在小秦淮初亢氏業鹽與安氏齊名謂之北安
西亢亢氏構園城陰長里許自頭敵臺起至四敵臺
止臨河造屋一百間土人呼爲百間房至今地址尙

存而亭舍堂室已無考矣惟流文蕩畫橋一石款識
十一字云丙寅清和八十一老人方文書尙嵌在楊
高三家水門上

南柳巷在東岸有水巷甃小階級爲江園水船便宜
門西門糞船之馬頭亦間有遊人於此登舟者河中
有泉在水巷口河邊色清味冽不減下院井水長則
沒水落則出非烹茶釀酒不常取郡城烹茶不取汲
於井水如天甯廣儲西北大東小東諸門自保障湖
來者謂之船水南門鈔關徐甯缺口東關便益諸門
自官河來者謂之河水至城中井水之可用者天甯

門青龍泉東關廣陵濤二泉近今青龍泉已胥廣陵
濤在東關南城腳人家中幾無可考其餘僅供灌溉
謂之喫水井無可甲乙而丁家灣井亭井西方寺四
眼井爲差勝若是河之井里中未之知也若廣陵濤
之名辨之者如聚訟汪容夫廣陵曲江考力駁秀水
朱檢討之說以七發八月觀濤爲在廣陵而不在浙
江然而濤在廣陵必非井泉小水之謂也今東關城
下之說亦有二一說在城門外馬頭下一說在城內
小城洞中蓋始東關茶肆有名廣陵濤者又浴池有
名廣陵濤者後遂相沿指其地非廣陵濤之真所也

其實東關城下之泉味自清冽不可沒

北柳巷在南柳巷之北有董子祠先爲正誼書院明
正德間改正誼祠祀漢丞相董仲舒又貯春秋繁露
一書 本朝 聖祖賜正誼明道額遂名董子祠

姜家墩在大街之北巷內由倉聖祠樂善庵抵天甯
門內城腳西接城河東岸東接天甯門街磨房巷

倉聖祠在姜家墩路西蜀僧大巖自巴州得倉聖像
供奉入江南居樂善庵乾隆己酉遷於是祠祠記爲
朱立堂森桂撰應叔雅灋書匾對汪損之大黌書

天心墩在河東岸縣互數十丈高與城齊深藤密菁

巖鵲騫騰登者側身捫蘿乃得上俯視屋舍與蒿里相錯墩上遺事古蹟載在幽怪錄及郡志中

東水關兩岸甃石上設板船過抽板人過則搭板以各城管鑰啟閉爲常

小秦淮之名不載志乘按王文簡虹橋遊記云出鎮淮門循小秦淮折而北爲虹橋則小秦淮當在虹橋之上平山堂圖志云小秦淮爲小東門內夾河又以小東門夾河爲小秦淮今皆依圖志所稱而舊名遂無知者

虹橋修禊元崔伯亨花園今洪氏別墅也洪氏有二

園虹橋修禊爲大洪園卷石洞天爲小洪園大洪園有二景一爲虹橋修禊一爲柳湖春泛是園爲王文簡賦冶春詩處後盧轉運修禊亦於此因以虹橋修禊名其景列於牙牌二十四景中恭邀 賜名倚虹園園門在渡春橋東岸門內爲妙遠堂堂右爲饒春堂臨水建飲虹閣閣外方壺島嶼溼翠浮嵐堂後開竹徑水次設小馬頭逶迤入涵碧樓樓後宣石房旁建層屋 賜名致佳樓直南爲桂花書屋右有水廳面西一片石壁用水穿透杳不可測廳後牡丹最盛由牡丹西入領芳軒軒後築歌臺十餘楹臺旁松柏